

Primère cartè nabëquë'ë San Juan

Di'dzë naguëne'e vidë sin fin

1 Antsë guinlú guédchiliu nanú tubi nanabani; perë guná na'a lúhi', nu bini na'a shtí'dzi', nu guna'zi na'a guiá'ai'. Náhi' el quë narni'i diza'quë shtë Dios. Por shtí'dzi' nadápa'a vidë sin fin. ²Mizmë lë'ë më gubani'nú më Dios, Shtáda'a, perë bëlua'alú më lu na'a. Bëdchini më guédchiliu. Guná na'a lúhi'. Na na'a testigu shtëni'. Ruadi'dzë na'a lu të nabani më; nápëdi'i' fin. ³Ruadi'dzë na'a lu të mizmë shtí'dzi' naná bini na'a. Ruadi'dzë na'a lu të lo quë nabë'në më parë gac bë'a të shtí'dzë më. Zni gac unidë grë hia'a; guédápa'a mizmë llgabë. Guldí hia'a ruadi'dzë'nú hia'a Dadë Dios con shíni' Jesucristo. ⁴Iurní quëquëa'a di'dzë la'ni cartë rë' të parë gac cumplir guëquitë ldu'u të nu parë guëquitë ldu'u na'a.

Dios rne'e llni

⁵Ndë'ë na diza'quë nabëlua'a Dadë Jesucristo, nu bëdia'a di'dzë na'a lu të de quë guldí Dios, nápëdi'i' duldë; limpi náhi' ziquë llni. ⁶Si talë rni'i' hia'a nané hia'a lë'ë më perë tsagla'guë'nú

hia'a duldë, bishi na hia'a; adë guldídi'ia'a iurní; nu adë quëréldëdi'i' hia'a bien. ⁷Perë si talë guëdé'na'a cumplir shtí'dzë Dios, adë chu rúnëdi'i' duldë, unidë na hia'a mizmë lë'ë hia'a. Rac shtu'u hia'a bëchi la sa' hia'a iurní, nu rënë shtë Jesucristo shini Dios, tsagla'guë rzuné almë shtë hia'a de grë duldë.

⁸Si talë guëni'i' hia'a adë chu nápëdi'i' duldë, lo mizmë lë'ë hia'a rsigué hia'a lë'ë hia'a. Bishi na ldu'u hia'a iurní. ⁹Bënë na më; runë më cumplir shtí'dzë më. Justë na më; runë më igual con grë mënë. Runë më perdunë grétë' duldë shtë hia'a iurë guëshubë dúlda'a lu më con guëdubini' ldu'u hia'a. Iurní rzuné më almë shtë hia'a de grë duldë nanadápa'a. ¹⁰Si talë rni'i' hia'a adë chu nápëdi'i' duldë, quëgni'i' hia'a bishi na Dios purquë hia guni'i' më grë hia'a nadápa'a duldë. Si talë rni'i' hia'a adë nápëdi'ia'a duldë, nídi'i' shtí'dzë më la'ni ldu'u hia'a iurní.

Nápa'a tubi naguëni'inú lë'ë Shtáda'a

2 Lë'ë të Dadë, caquëa'a di'dzë rë' lu të parë adë gúnëdi'i' të duldë perë si talë chu quëhunë

duldë, nápa'a tubi naguëni'inú lë'ë Shtáda'a por lë'ë hia'a. ¿Chu më ni? Lë'ë na Jesucristo; tubldí na shcuëndi' lu Dios. ²Jesucristo guti lu cruz por duldë shtë hia'a. Gudilli më por grë duldë nanapë mënë naré lu guédchiliu. Por galguti shtënë më, bédchisú më duldë shtëna'a nu gu' Dios cunformë.

³Si talë tsagla'guë guëzu'bë diága'a mandamientë shtë Jesucristo, iurní nané hia'a lë'ë më. Rac bë'a hia'a lë'ë më de verdá. ⁴Perë si talë tubi hia'a guëni'ia'a: “Nanéa Dios”, perë mizmé tiempë adë quëzu'bë diáguëdi'ill mandamientë shtë më, bishi nall iurní. Nádi'ill verdá. ⁵Perë si talë lë'ë hia'a rzu'bë diága'a di'dzë shtë më, rlua'a de quë tsagla'guë rac shtu'u hia'a lë'ë më. ⁶El quë narni'i quëbezënull Dios, napë quë guëquërdëll ziquë guëquërdë Jesucristo lu guédchiliu; adë bé'nëdi'i më duldë.

Mandamientë cubi

⁷Dadë, adë guëquë'ëdia'a stubi mandamientë naná gurënë sino quë mizmé mandamientë nanapë të dizdë bini të diza'quë shtë më. Lo quë nabëquëa'a iurne', na igual ziquë ra di'dzë nabë'në të recibir guahietë. ⁸Perë quëquëa'a tubi mandamientë cubi; primëre bë'në më cumplir mandamientë ni; iurní lë'ë të quëhunë të cumplirin. Lë'ë të napë të di'dzë rë' la'ni ldu'u të. Riagla'guë rzu'bë diaguë të shti'dzë më. Nacahi nananú la'ni ldu'u të rialuhin. Llni shtë Dios bédchini.

⁹Si talë chu rni'i quëbezënull lë'ë më perë mizmé tiempë adë rac

shtú'udi'ill sa'll, nacahi cabézëll.

¹⁰El quë narac shtu'u los de más narialdí ldu'i Dios, cabezënull llni la'ni ldu'ull; adë rláguëdi'ill lu duldë. ¹¹Perë el quë narac shtú'udi'i sáhi'; el quë narná zá'quëdi'i lu sáhi', nacahi cabezë ldu'ull. Rzëll ziquë ciegu. Rnádi'ill shnezë Dios purquë në'au slull; bë'në duldë.

¹²Dadë, quëquëa'a di'dzë rë' purquë guc perdunë duldë shtënë të. Bë'në më perdunë lë'ë të purquë guti Jesús shlugar të; nasalvar të iurne'. ¹³Dadë, quëquëa'a lu të purquë nané të el quë nanabani dizdë antsë binlú guédchiliu. Quëquëa'a lu të, sultërë, purquë adë bé'nëdi'i të lo quë narac shtu'u mëdzabë. Quëquëa'a lu të, llguë'në, purquë runguë bë'a të Dios, Shtáda'a. ¹⁴Quëquëa'a lu të naná Dadë purquë nané të el quë nanápëdi'i fin. Quëquëa'a lu të naná sultërë purquë quëhunë të cumplir shti'dzë Dios con guëdubinú ldu'u të. Bë'në të gan lu mëdzabë.

¹⁵Adë rac shtú'udi'i të ra cusë nananú lu guédchiliu, purquë grë ra narac shtu'u ra cusë shtë guédchiliu, adë rac shtú'udi'ill Dios. ¹⁶Ra cusë mal narac shtu'u ldu'u nguui, nu ra cusë chulë narac shtu'u ra nguui gapë, nu ra cusë narunë naru'bë mënë, grë ndë'ë na cusë shtë guédchiliu, lëdë Diósëdi'i. ¹⁷Grë ra cusë shtë guédchiliu, rialú con grë mal llgabë narac shtu'u mënë, perë el quë narunë narnibë'a Dios, adë rialúdi'ill. Nápëll vidë sin fin.

Verdá nu bishi

¹⁸Dadë, hia bédchini tiempë tsalú guédchiliu. Bini të antsë

napë quë guëdchini tubi nagunë cuntrë Jesucristo. Hashtë iurne' nanú zihani narunë cuntrë Jesús. Por ni nané hia'a bēga'a iurē tsalú guédchiliu. ¹⁹Lē'ē ra nguui ni narunë cuntrë Jesús, bēazē guetē rall de lē'ē hia'a. Nunquē adē guc rall shini mē de verdá purquē adē riaglá'guēdi'i rall con shti'dzē mē. Si talē niac rall narialdí ldu'i shti'dzē Dios de verdá, nēa'nē rall con lē'ē hia'a. Bēazē guetē rall. Iurní rlua'a clarē nádi'i rall shini Dios.

²⁰Lē'ē tē napē tē llni purquē quēbezēnú Espíritu Santo la'ni ldu'u tē. Rac bē'a tē cusē shtë Dios. ²¹Adē rquí'nidi'i guēquēa'a lu tē purquē nané tē verdá. Nané tē guadē naná verdá nu guadē naná bishi. Nané tē el quē naruadi'dzē bishi, zédēdi'ill de Dios.

²²¿Chu na más nabishi entrē lē'ē mēnē? pues el quē narni'i Jesús lédēdi'i nabēshe'ldē Dios. El quē narni'i zni, quēhúnēll cuntrē Jesús. Quēhúnēll cuntrē Dios nu quēhúnēll cuntrē shini Dios. ²³Grē mēnē narni'i Jesús lédēdi'i el quē nagudili Dios parē guēnibē'ai', nápēdi'i nguui ni Dios Padre. Perē el quē narni'i Jesús na el quē nabēshe'ldē Dios, nguui ni quēbezēnú Dios.

²⁴Gulē tsagla'guē guēzu'bē diaguē tē ra di'dzē nabini tē iurē gualdí ldu'u tē shti'dzē mē. Si talē guēsa'nē tē cuezē shti'dzē Dios la'ni ldu'u tē, napē tē Jesús nu napē tē Dios Padre con lē'ē tē. ²⁵Mizmē Jesucristo guni'i lu hia'a, guēne'e mē vidē sin fin parē lē'ē hia'a.

²⁶Quēquēa'a di'dzē rē' lu tē parē gac bē'a tē lla na ra nguui narac

shtu'u guēsigué lē'ē tē. ²⁷Perē nídi'i nicidá guēlua'a mēnē lē'ē tē purquē quēbezēnú Espíritu Santo lē'ē tē; náhi' mēsē shtë tē. Napē tē llni shtëhi'. Quēgluá'ai' naná verdá nu naná bishi. Shti'dzi' na verdá, lédē bíchidi'i. Nu guni'i', gulē bēdē'ē lugar cuezēnú Jesús ldu'u tē.

²⁸Gulē bēquē diaguē, Dadē; gulē bēdē'ē lugar cuezēnú Jesús ldu'u tē, tē iurē guēdchini mē stubi vueltē, adē chu rtúdi'i lúhi'; adē chu guēllú'nēdi'i lúhi'. Mejurē guēquitē ldu'u tē iurē guēdchini mē. ²⁹Si talē rdē'ē tē cuendē de quē tubldí na shcuendē Jesús lu Dios, gulē bēdē'ē cuendē, grē mēnē nanabani ziquē gubani mē, na rall shini mē.

Ra shini Dios

3 Gulē bēdē'ē cuendē blac rac shtu'u Dios lē'ē hia'a. Rni'i mē na hia'a shíni'. Ra mēnē narialdídi'i ldu'i shti'dzē Dios, rdē'ēdi'i rall cuendē chu na Jesús. ²Lē'ē tē Dadē narac shtua'a, na hia'a shini Dios iurne', perē rluá'adi'i lla gáca'a más delantē. Pues rdē'ē hia'a cuendē dzē naguēdchini mē stubi vueltē, gáca'a ziquē na mē purquē guēná hia'a lu mē tal ziquē na mē. ³Grē ra narialdí ldu'i guēdchini mē, gac cambi mudē nanabánill; adē tsaglá'guēdi'i gúnēll duldē. Rac shtú'ull gáquēll ziquē lē'ē mē.

⁴Grē ra narunē duldē, runē rall faltē lu lēy shtë Dios. Napē rall faltē lu Dios. Grē duldē na cuntrē lēy nabēne'e Dios. ⁵Nané tē bēdchini Jesús parē guēzunē mē almē shtëna'a. Nápēdi'i mē duldē. ⁶El quē narzu'bē diaguē shti'dzē Jesús, tsaglá'guēdi'i gúnēru'ull

duldë. El quë nariagla'guë gunë duldë, adë rdé'edi'ill cuendë chu na më. Nunquë bënguë bé'adi'ill lë'ë më. ⁷Dadë, adë rdé'edi'i tē sī guësiguë mënë lë'ë tē gunë tē duldë. El quë narunë cumplir shti'dzë Dios, tubldí na shcuëndëll lu Dios igual ziquë na Jesús lu Dios. Justë na më. ⁸El quë nariagla'guë runë duldë, nall shini mëdzabë Satanás purquë Satanás antsë cueshtë gué'dchiliu, bé'nëll duldë. Por ni Jesús, shini Dios, bëdchini lu gué'dchiliu parë guëchili më dchi'ni shtë mëdzabë. ⁹El quë nanapë vidë shtë Dios, adë tsaglá'guëdi'i gúnëll duldë purquë hia bidë mizme vidë shtë Dios la'ni ldu'u nguui ni; adë ni mudë gúnëru'ull duldë purquë gúlëll nacubi por pudërë shtë Dios. ¹⁰Zni rlua'a chu na shini më nu chu na shini Satanás. El quë natsagla'guë gunë duldë, nápëdi'ill vidë cubi shtë Dios. El quë narac shtú'udi'i bëchi sáhi', nápëdi'ill vidë shtë më.

Runë tucarë gac shtu'u hia'a sa' hia'a

¹¹Di'dzë rë' bini tē dizdë binlú diza'quë: napë quë gac shtu'u hia'a grë sa' hia'a. ¹²Adë guédé'nëdi'ia'a ziquë Caín. Gúquëll shini mëdzabë nu gudínill bëchill. ¿Pëzieliú gudínill bëchill? purquë grë lo quë nabé'nëll, na mal lu Dios, perë bëchill lo quë nabé'nëll na bien lu Dios. ¹³Dadë, lë'ë tē narialdí ldu'u shti'dzë Dios, adë rdzëguë'di'i ldu'u tē si talë ra mënë shtë gué'dchiliu rna zá'quëdi'i rall lu tē. ¹⁴Nané hia'a gudéda'a lu galguti hashtë nadápa'a vidë sin fin purquë de verdá rac shtu'u hia'a ra narialdí ldu'i Dios. El quë nadë

rac shtú'udi'i bëchi sáhi', todavía nápëdi'ill vidë sin fin. ¹⁵El quë narná zá'quëdi'i lu sáhi', nall ziquë narguini mënë. Nané hia'a el quë narguini mënë, nápëdi'ill vidë sin fin. ¹⁶Por Jesús nané hia'a lla na Dios, el quë narac shtu'u de verdá. Jesús guc cunformë; gúti' lu cruz por lë'ë hia'a. Por ni runë tucarë guédë'ë hia'a vidë shtë hia'a parë sa' hia'a. ¹⁷Si talë tubi hia'a nápa'a ra cusë shtë gué'dchiliu nu tubi sa' hia'a napë nicidá, napë quë guédé'na'a compa'ni lë'ëll. Si talë nédi'ia'a guédë'ë hia'a nacá'all, rac shtú'udi'ia'a Dios iurní. ¹⁸Bëchi, gac shtu'u hia'a sa' hia'a de verdá, lédëdi'i con di'dzë shtëna'a sulamëntë, guédë'ë hia'a narqui'ni sa' hia'a.

Nápa'a confiansë lu Dios

¹⁹Si talë guédé'na'a cumplir di'dzë rë', gac bë'a hia'a na hia'a shini Dios de verdá. Zni adë rdzëbëdi'i ldu'u hia'a lu më iurë shgába'a quëgni'i guéca'a. ²⁰Si talë nápa'a llgabë naquëgni'i guéca'a, nápëdi'ia'a confiansë lu më iurní, perë na më más më ru'bë quë shgába'a, nu nané më grë cusë nananú la'ni ldu'u mieti. ²¹Lë'ë tē narac shtua'a, si talë adë nápëdi'ia'a llgabë naquëgni'i guéca'a, nápa'a confiansë lu Dios. Adë rdzëbëdi'ia'a lu më ²²nu rne'e më ra cusë narná'ba'a lu më purquë dzudé'na'a cumplir lo quë narac shtu'u më. Dzudé'na'a cumplir mandamientë shtë më. ²³Ni na mandamientë shtë më, tsaldí ldu'u hia'a shini më Jesucristo, nu rnibë'a më gac shtu'u hia'a bëchi sa' hia'a. Zni bësëa'në

më mandamientë shtë më. ²⁴Grë ra narunë cumplir mandamientë shtë më, quëbezënú raí' Dios nu quëbezënú Dios lë'ë raí'. Nané hia'a quëbezënú më lë'ë hia'a purquë bédë'ë më Espíritu Santo parë cuezënúhi' lë'ë hia'a.

Espíritu shtë Dios nu espíritu narunë cuntrë Dios

4 Lë'ë të narac shtua'a, adë tsaldídi'i ldu'u të grë ra mësë narni'i de quë ruadi'dzë rall por Espíritu shtë Dios sino gulë bëtë'dë prëbë shti'dzë rall parë gac bë'a të si talë bëshe'ldë Dios lë'ë rall tsaglua'a rall. Zihani mënë falsë riaglua'a rall ra mënë. ²Por ndë'ë gac bë'a të chu naze'dë con shti'dzë Dios. Grë ra nguii narni'i Jesús bédchini lu gué'dchiliu nu na më Cristo, el quë nagudili Dios parë guënbé'ái', el quë narlua'a di'dzë ni, nall verdá. ³Perë grë ra nguii narni'i adë bédchínidi'i Jesucristo lu gué'dchiliu, zé'dëdi'i nguii ni de Dios. Cagní'ill bishi naze'dë por pudërë shtë contrari shtë Jesús. Hia bini të guédchini narunë cuntrë Jesús; pues iurne' hia quëréldëll lu gué'dchiliu.

⁴Dadë, na të shini Dios. Adë guédë'ëdi'i të sí guësigué mësë falsë lë'ë të. Adë tsaldídi'i ldu'u të shti'dzë rall purquë más pudërë napë el quë naquëbezënú lë'ë hia'a quë el quë narnibë'a lë'ë mënë shtë gué'dchiliu. ⁵Ra mësë falsë ruadi'dzë rall cusë shtë gué'dchiliu, lédëdi'i shti'dzë Dios. Los de más mënë shtë gué'dchiliu, rianaldë rall shti'dzë mësë ni. ⁶Perë lë'ë hia'a na hia'a shini Dios. Grë ra narunguë

bë'a Dios, rdë'ë rall cuendë shti'dza'a. El quë nanádi'i de Dios, adë rzu'bë diáguëdi'ill shti'dza'a. Zni nané hia'a chu napë Espíritu Santo nu chu napë espíritu shtë nargugué.

Dios rac shtu'u më lë'ë hia'a

⁷Lë'ë të narac shtua'a, tsagla'guë gac shtu'u hia'a bëchi sa' hia'a purquë rac shtu'u Dios lë'ë hia'a. El quë narac shtu'u sáhi', gúlëll nacubi por pudërë shtë më. Nápëll tubsë Dios Shtádëll. ⁸El quë nadë rac shtú'udi'i sáhi', nápëdi'ill Dios Shtádëll, purquë rac shtu'u Dios lë'ë mënë. ⁹Bëlua'a më de quë rac shtu'u më lë'ë hia'a; bëshe'ldë më tubsë shini më lu gué'dchiliu parë guédápa'a vidë sin fin. Guébánia'a parë siemprë. ¹⁰Zni bëlua'a më rac shtu'u më lë'ë hia'a de verdá. Bëshe'ldë më shini më; por galguti shtë Jesús bëa'në Dios cunformë purquë bëllë'ë rënë shtëhi' por ra duldë shtëna'a.

¹¹Lë'ë të narac shtua'a, guc shtu'u Dios lë'ë hia'a zni, por ni napë quë gac shtu'u hia'a sa' hia'a. ¹²Ni tubi mënë guná Dios, perë si talë rac shtu'u hia'a sa' hia'a, quëbezënú Dios lë'ë hia'a, nu tsagla'guë rac shtu'u hia'a sa' hia'a más. ¹³Nané hia'a cabezënú më lë'ë hia'a nu quëbezënú hia'a con lë'ë më purquë bëne'e më Espíritu Santo naze'dë de lë'ë më. Cabezënúhi' lë'ë hia'a. ¹⁴Lë'ë na'a, ra poshtë, guná na'a lu Dadë Jesús nu tsagla'guë rni'i na'a lu ra mënë bëshe'ldë Dios lë'ë shini më, Jesús. Nápi' pudërë; gúni' salvar ra mënë shtë gué'dchiliu. ¹⁵Lë'ë naná rni'i lu ra mënë Jesús

na shini Dios, cabezēnú Dios lē'ēll nu unidē nall con Dios.

¹⁶Nané hia'a nu tsagla'guē tsaldí ldu'u hia'a de quē demasiadē rac shtu'u mē lē'ē hia'a, grē hia'a. Nalē rac shtu'u mē grē mēnē. Si talē rac shtu'u hia'a lē'ē sa' hia'a, cabezēnú mē lē'ē hia'a, nu nápa'a mizmé vidē shtē mē. ¹⁷Dú'pēga dú'pēga rac shtu'u hia'a lē'ē mē más. Zni nápa'a confiansē lu mē iurē gunē mē juzguē lē'ē hia'a. Rdzēbēdi'ia'a lē'ē mē purquē ziquē na Jesús, na hia'a ndē'ē lu guē'dchiliu. ¹⁸El quē nardzēbē lē'ē mē, rac shtú'udi'ill lē'ē mē purquē si talē rac shtu'u hia'a lē'ē mē con guēdubínú ldu'u hia'a, nídi'i lugar parē guēdzēba'a lē'ē mē. El quē nardzēbē lē'ē mē, rzac zill mizmé lē'ēll. El quē nardzēbē lē'ē mē, todavía runē faltē gac shtú'ull Dios.

¹⁹Rac shtu'u hia'a lē'ē mē purquē primērē lē'ē mē guc shtu'u lē'ē hia'a. ²⁰Si talē tubi hia'a rni'i: "Rac shtua'a lē'ē mē", perē adē rac shtú'udi'ia'a bēchi sa' hia'a, nabísha'a. El quē narac shtú'udi'i sa'll nagunall, tampusquē rac shtú'udi'ill Dios nanadē gunádi'ill. ²¹Lē'ē mandamientē shtē mē nabēdē'na'a recibir de lē'ē mē rni'i zndē'ē: El quē narac shtu'u Dios napē quē gac shtú'ull sa'll.

Pudērē shtē narialdí ldu'i Jesús

5 Grē ra narialdí ldu'i Jesús, el quē nagudili Dios parē guēnibē'ai', nápēll vidē shtē mē; nall shini Dios. Nu grē ra narac shtu'u Dios, también rac shtú'ull ra shini mē, ra nanapē vidē sin fin por pudērē shtē mē. ²Nané hia'a rac

shtu'u hia'a ra shini Dios iurē rac shtu'u hia'a Dios de verdá nu rzu'bē diága'a mandamientē shtē mē. ³Si talē rzu'bē diága'a ra mandamientē shtē mē, iurní rac shtu'u hia'a Dios de verdá. Mandamientē shtē mē nádi'in ziquē tubi cusē nē'ē; nádi'in naganē, ⁴purquē grē ra nabēsa'nē guēdchini vidē cubi la'ni ldu'i, rúnēdi'ill duldē. Nápēll pudērē; gúnēll gan lu mēdzabē. ¿Lla mudē guēdē'na'a gan lu mēdzabē? pues si talē tsaldí ldu'u hia'a shti'dzē Dios, guēdē'na'a gan lu cusē mal shtē guē'dchiliu. ⁵El quē narialdí ldu'i shti'dzē Jesús na shini Dios, rúnēll gan lu grē cusē mal nananú lu guē'dchiliu.

Jesús na shini Dios

⁶Jesús na shini Dios. Iurē bēriubē nisē Jesús, nu iurē guti mē, bē'nē Dios testificar na Jesús shíni'.

⁷También Espíritu Santo quēhunē testificar de quē na Jesús shini Dios. Adē rni'idi'i Espíritu Santo bishi. ⁸Tsunē testigu cabezē lu guē'dchiliu narni'i igual; Espíritu Santo rni'i Jesús na shini Dios, nu galēriubē nisē shtē mē con galguti shtē mē, rlua'a na mē shini Dios.

⁹Grē hia'a rialdí ldu'u hia'a lo quē narni'i ra testigu verdadērē, perē mayurē na shti'dzē Dios. Bē'nē mē testificar Jesús na shíni'. ¹⁰El quē narialdí ldu'i Jesús na shini Dios, nanēll la'ni ldú'ull nahin verdá. Perē el quē narialdídí'i ldu'i Jesús, cagní'ill nabishi Dios purquē Dios guni'i clarē na Jesús shíni'. El quē narialdídí'i ldu'i Jesús nádi'ill shini Dios, adē rúnēdi'ill recibir ra di'dzē shtē Dios Padre. ¹¹Pues Dios bē'nē

testificar lu hia'a nápa'a vidë sin fin por Jesús. El quë naná unidë con Jesús shini Dios, nápëll vidë sin fin. ¹²El quë nanapë Jesús la'ni ldu'ull, nápëll vidë eternë perë el quë nanápëdi'i Jesús, runë faltë vidë shtë Dios.

Nané hia'a nápa'a vidë sin fin

¹³Lë'ë të naná rialdí ldu'i Jesús na shini Dios, caquëa'a cartë rë' lu të parë gac bë'a të napë të vidë sin fin por Jesús. ¹⁴Iurní adë rdzëbëdi'ia'a lu Dios. Rialdí ldu'u hia'a de quë si talë rná'ba'a lu Dios, guëne'e më cusë narná'ba'a. Napë quë gáca'a cunformë según voluntá shtë më. ¹⁵Si talë nané hia'a rini më shtë'dza'a, también nané hia'a nápa'a ra cusë narná'ba'a lu më.

¹⁶Si tubi të rna të bëchi sa' të quëhúnëll duldë, perë duldë naquëhúnëll nuá'adi'in cashtigu shtë galguti, napë quë guëná'bël lu Dios por nguii ni. Guëdë'ë Dios vidë parë nguii ni. Nanú duldë

nargú galguti; adë rnibë'adia'a guëna'bë të lu Dios por el quë narunë duldë ni. ¹⁷Gulë guna'bë lu Dios por nguii nanapë duldë nanuá'adi'i cashtigu shtë galguti. Stubi clasë duldë rgu galguti, gati nguii.

¹⁸Perë nané hia'a grë ra nanapë vidë cubi shtë Dios, adë tsaglá'guëdi'i gúnëll duldë purquë Jesús, shini Dios, quëhapë lé'ëll. Gúnëdi'i mëdzabë gan lu nguii ni. ¹⁹Nané hia'a nápa'a vidë shtë Dios. Na hia'a shini më, perë grë mënë shtë gué'dchiliu, nanú rall guia'a mëdzabë Satanás. ²⁰Perë Jesús, shini Dios, bédchini lu gué'dchiliu nu bëluá'ai' lë'ë hia'a. Por lë'ë më runguë bë'a hia'a Dios verdadërë. Nu na hia'a shini më. Na më Shtëáda'a. Nané hia'a Jesucristo na shini Dios. Na më Dios verdadërë nu por lé'i' nápa'a vidë sin fin.

²¹Bëchi, gulë gapë mizme lë'ë të. Adë tsaldídi'i ldu'u të ra dios falsë shtë mënë. Amén.